

2 Аманкелдідегі ахуал қандай?



3 Қорқыт ата университеті: жаңа міндеттер мен игі істер



4 «Апай, біз келдік!»



4 25 адам айығып шықты



# Сыр бойы

Қызылорда облыстық қоғамдық-саяси газет • 1929 жылдың 1 шілдесінен шығады

№58  
(19934)



21 сәуір, сейсенбі 2020 жыл

e-mail: syrboyi@yandex.kz / www.syrboyi.kz

## САПАР

### ОҢТҮСТІК АУДАНДАР: КҮРДЕЛІ ЖАҒДАЙ КЕМШІЛІКТІ КЕШІРМЕЙДІ



Кеше облыс әкімі Гүлшара Әбдіқалықова эпидемиологиялық ахуалы күрделенген Жаңақорған және Шиелі аудандарында болды. Тосқауыл бекеттеріндегі карантин талаптарының орындалуын тексеріп, ауруханаларда ем алып жатқан науқастардың және медициналық бақылауға алынған азаматтардың жағдайымен танысты деп хабарлайды облыс әкімінің баспасөз қызметі.

Жаңақорған кентінде 4 санитарлық тосқауыл бекеті жұмыс істейді. Медицина, полиция және әкімдік қызметкерлері тәулік бойы кезекшілікте тұр. Тұрғындардың жүріп-тұруына қатаң тыйым салынған. Қызметкерлер ыстық тамақ және жеке қорғаныш құралдарымен қамтамасыз етілген. Ауданда вирус жұқтырған адамдар жұқпалы аурулар ауруханасында, ал олармен қарым-қатынаста болғандар «Жаңақорған шипажайына» жатқызылған. Қазіргі таңда 80 адам дәрігерлердің бақылауында.

Кент орталығындағы 15 сауда орны, «Қазактелеком», «Қазпошта» ғимараттары, 20 аялдама, негізгі көшелер және науқастар

тіркелген Әлімқол, Бөгайдар Аралбаев, Женіс, Әлшекей көшелерінде залалсыздандыру жұмыстары жүргізілген. Жалпы көлемі 527 667 шаршы метр аумақ дезинфекцияланып, адам көп шоғырланатын жерлерде қозғалыс шектелген. Аймақ басшысы аудан әкіміне жағдайды ұдайы назарда ұстауды және карантин ережелерін мүлтіксіз орындауды тапсырды. Мұнан кейін облыс әкімінің сапары Шиелі ауданында жалғасып, кіреберісте орналасқан тосқауыл бекетіне барды. Жалпы ауданда 11 санитарлық бекет құрылып, бірқатар ауылдық округте қатаң шаралар енгізілген. Коронавирус індеті анықталып, карантинге жабылған Ортақшыл,

Қодаманов, Бала би, Жиделіарық елді мекендерінің тұрғындары жергілікті кәсіпкерлер есебінен тегін азық-түлік және медициналық бұйымдармен қамтамасыз етілуде.

Облыс әкімі Шиелінің индустриалды аграрлық колледжіндегі медицина мамандарымен сөйлесті. Олардың дәрі-дәрмек және қорғаныш киімдерімен қамтамасыз етілгені баяндалды.

Аудандық аурухананың ескі ғимаратында вирус жұқтырған

4 адамға тиісті ем жасалып жатыр. Мұнда науқастарға арнайы оқшау орын қарастырылған. Емделушілердің жағдайы қанағаттанарлық.

Ал «Гежуба Шиелі цемент» зауытының жатақханасы қазір дәрігерлерге оқшау орын ретінде тынығып, демалуларына берілген.

46 жағдай тіркелген Қодаманов ауылы – маңызды назардағы қоныс. Елді мекен толыққанды оқшауланған. Осы ауылдан шыққан науқастар облыс орталығындағы жұқпалы аурулар ауруханасында ем қабылдап жатыр. Аймақ басшысы тұрғындарды сабырлы болуға шақырып, жағдай тұрақталмайынша, қатаң карантин ережелерін сақтау керектігін ескертті.

«Біз үшін қазір ең бастысы – дендеген дертті тоқтату. Азық-түлік, дәрі-дәрмек арнайы көліктермен жеткізіледі. Ауылдан ешкімді шығармай, сырттан ешкімді кіргізебеу керек. Вирус жұқтырған адамдардың тезірек жазылып шығуына бар күш-жігерді жұмылдырамыз» деді облыс әкімі.

Ауданда осы күнге дейін 1 млн 262 мың шаршы метр аумақ залалсыздандырылып, 28 млн теңгеге антисептик, хлор, қорғаныш киімдері және басқа да медициналық бұйымдар сатып алынған.

Сапар қорытындысында облыс әкімі ауданда атқарылып жатқан жұмыстардың тиісті деңгейде емес екенін, талаптардың уақытылы орындалмауы салдарынан көпшілік шаралар өткізіліп, аурудың тез таралуына жол берілгенін айтып, аудан басшылығына ескерту жасалды.

2-бет.



## АЗЫҚ-ТҮЛІК ҚАУІПСІЗДІГІ

### ТОҒЫЗ ТҮРЛІ ТАУАР бағасының өсуіне жол берілмейді

Елімізде жарияланған төтенше жағдай уақытында рұқсат етілген азық-түлік, дәрі-дәрмек, ауылшаруашылық, өмір сүруді қамтамасыз ететін қызметтер барлық санитарлық қауіпсіздік талаптарын сақтай отырып, жұмыс жасауы керек. Төтенше жағдай уақытында атқарушы билік тарапынан аймақтың экономикасын тұрақтандыру мақсатында бірқатар шаралар қабылданып жатыр.

Сондай шаралардың бірі – әлеуметтік маңызы бар азық-түлік тауарлары бағасының өсуіне жол бермеу. Біріншіден, облыста алдағы үш айға қажетті қор жасауға азық-түлік өнімдерінің 18 түрі бойынша тұрақтандыру қорына 5 мың тоннаға жуық өнім сатып алу ұйымдастырылған.

Тұрақтандыру қорында 2 мың тоннадай өнім болса, оның ішінде 1,3 тоннасы қоймада, 500 тоннасы жеткізушілердің қоймаларында және 128 тоннасы (1 сортты ұн) жолда. Аталған өнімдер халыққа нарықтан төмен бағада сатылуда. Қызылорда қаласында өнімдер негізінен 22 әлеуметтік дүкен арқылы сатылса, аудандарға 2 рефрижератор көлігі арқылы тасымалдануда.

Екіншіден, 1 сортты ұн бағасын тұрақтандыру және әлеуметтік нанның бағасын қымбаттатпау мақсатында Ауыл шаруашылығы министрлігі, «Азық-түлік келісім-шарт» корпорациясы, «Астық өңдеушілер» одағы және облыс әкімдігі арасында суыр-тамыз айларында ай сайын әр килограмма 130 теңгеден (бұл – тұрақтандыру қорының қоймасына келетін баға) 2475 тонна 1 сортты ұнды облысқа жеткізу туралы меморандумға қол қойылған. Осыған орай, Қызылорда қаласы мен аудан әкімдіктері наубайханаларға ұнды жеткізу бойынша келісім-шарттар жасап, жеткізіп беруді ұйымдастыру қажет.

2-бет.

## САҚШЫ



### ТӘРТІП – ЖЕҢІСКЕ БАСТАЙТЫН ЖОЛ

Тәртіп сақшылары қоғамдық қауіпсіздікті сақтау бағытында қай кезде де алдыңғы шепте жүреді. Қазіргі сын сәтте де полиция қызметкерлері уақытпен санаспай, өздеріне жүктелген міндетті абыроймен атқаруға күш салып жүр. Бұл әлемді дүрліктірген қауіпті індеттің бетін қайтаруға оң септігін тигізуде.

Әліжан ҮМБЕТ,  
«Сыр бойы».

Сонғы уақытта өзге әріптестері секілді Арыстанбектің жұмысы қауырт. Жер-дүниені жайлаған қауіпті кесел құрсауы Қызылорда өңіріне келгеннен бастап жергілікті тәртіп сақшылары тәулік бойына қызмет атқаруға кірісті. Арыстанбек қай уақытта да міндетіне зор жауапкершілікпен қарайды. Қоғам қауіпсіздігін сақтауға белсенділік танытады.

Қазір Қызылорда қаласында қауіпті індеттен сақтануға барынша назар аударылған. Тұрғындардың бейберекет жүруіне тыйым салынған. Автокөлік қозғалысына да шектеу бар. Бұл орайда полиция қызметкерлерінің жауапкершілігі ерекше. Әрбір қауіпсіздік шарасын сақтауға барынша көңіл бөледі. Арыстанбек осылайша қауіпті кеселден құтылу жолында өзінің нәтижелі іс

жасап жүргенін қоғам алдындағы зор міндеті санайды. – Адамдардың барлығы бірдей емес. Өрқайсысының мінезі әртүрлі. Талап барлығына ортақ. Оны сақтауға әрбір көңіл бөлуі тиіс. Өкініштісі, кейбір азаматтар оған мән бермейді. Қауіпті індеттен сақтану жолдарын қаперге ілмейді. Оның соны оры толмас жағдайға ұласуы мүмкін. Мемлекетіміз осы бағытта барлық қауіпсіздік шараларын қолға алды. Біз сол жұмыстардың өз деңгейінде орындалуына барынша үлес қосамыз. Күнде жаналықтарды назарға алып отырамыз. Жақсы нәтижеге қуанамыз. Оң істерге өз үлесімізді қосып жүргенімізді мақтаныш тұтамыз, – дейді Арыстанбек.

4-бет.

## ЖЕҢІЛ ӨНЕРКӘСІП

### ӨЗГЕГЕ ТӘУЕЛДІЛІК ӨКІНІШТІ ЕМЕС ПЕ?

Экономикалық заңдылықтарға сәйкес кез келген елдің экономикалық қауіпсіздігі мықты болу үшін жеңіл өнеркәсіптің үлесі 30%-ті құрауы керек. Озық технологияны меңгерген дамыған мемлекеттердің өзі осы ұстанымнан ауытқымауды жөн санайды. Алайда, бұл көрсеткіш әзірге бізге қол жетпес арман болып тұр. Шикізатқа малынып отырсақ та, жеңіл өнеркәсіптің жалпы ішкі өнімдегі үлесін көбейте алмай келеміз. Қазақстан нарығын импорттық тауарлар жаулап алған. Импортқа тәуелділік өз нарығымызды өзімізге игертер емес. Тұрасын айтқанда, Қазақстанның жеңіл өнеркәсібі туралап тұр. Базарлар мен сауда орындары сөрелерінде – Қытай мен Түркиядан, Ресей және Қырғызстаннан келген тауарлар. Мамандардың айтуынша, ел азаматтары киіп жүрген киімнің 80%-і сырттан келген. Біздің тігіншілер ішкі қажеттіліктің 10%-ін ғана өтеп отырған жайы бар.

2-бет.



ҮЙДЕБОЛЫҢЫЗ!





